

**Perlu nyatakan pendirian - TPM  
Utusan Online  
October 03, 2011  
Oleh MUHAMAD ZAID ADNAN**

KUALA LUMPUR 2 Okt. - Setiap parti dalam pakatan pembangkang perlu menyatakan pendirian rasmi masing-masing berhubung pelaksanaan hukum hudud yang terus dibangkitkan Pas.

Timbalan Perdana Menteri, Tan Sri Muhyiddin Yassin berkata, penjelasan itu penting kepada umat Islam dan bukan Islam yang ingin tahu pendirian sebenar parti-parti terlibat walaupun Majlis Pimpinan Pakatan (MPP) pembangkang Rabu lalu memutuskan hukum hudud tidak akan dilaksanakan.

Katanya, kegagalan parti-parti dalam pakatan pembangkang menjelaskan pendirian masing-masing berhubung isu hudud menunjukkan mereka mempunyai niat untuk menipu rakyat.

"Rakyat diletak dalam keadaan yang boleh dikatakan tidak menentu dan mereka mungkin dikelirukan berhubung tindakan pembangkang yang berbolak-dalik dalam isu hudud ini.

"Justeru kita mahu satu pendirian rasmi dan penjelasan daripada pakatan pembangkang dalam isu hudud. Adakah ia akan dibuat di Kelantan atau seluruh negara atau ia hanya untuk orang Islam? Sekiranya ia dilaksanakan, apakah mereka akan menyokong tindakan itu atau sebaliknya," katanya.

Beliau bercakap pada sidang akhbar selepas merasmikan Seminar Bersama Program dan Permainan untuk Ketua-Ketua Sektor Awam Malaysia dan Singapura 2011 di sini hari ini.

Dalam perkembangan lain, Muhyiddin yang juga Timbalan Pengerusi Barisan Nasional (BN) berkata, dakwaan Ahli Dewan Undangan Negeri (ADUN) Bentayan, Gwee Tiong Hiang bahawa beliau ada menerima tawaran oleh pihak yang mewakili Perdana Menteri, Datuk Seri Najib Tun Razak supaya keluar daripada DAP dan menjadi wakil rakyat Bebas akan disiasat.

Ditanya sama ada beliau sedar akan dakwaan Tiong Hiang itu, Muhyiddin berkata, beliau tidak mengetahui akan laporan berkenaan.

"Dalam politik, kadang-kadang kita jumpa rakan-rakan kita termasuk pembangkang di Parlimen. Kita bergurau dengan mereka dan mereka akan memberi reaksi secara spontan. Saya tidak tahu setakat mana seriusnya tuduhan wakil rakyat itu. Kita akan siasat," katanya.

Sementara itu, Muhyiddin mengingatkan rakyat khususnya ahli-ahli pertubuhan bukan kerajaan (NGO) supaya tidak mudah melenting dan buruk sangka akan tujuan perjumpaan pihak-pihak tertentu yang berkemungkinan atas dasar untuk kebaikan bersama.

"Kalau ada perkara tertentu yang rahsia, siapa yang boleh tahu. Kalau mereka bincang hal-hal tertentu, apakah hak kita untuk menuntut supaya mereka beritahu topik perbincangannya," katanya.

Source:

[http://www.utusan.com.my/utusan/info.asp?y=2011&dt=1003&pub=Utusan\\_Malaysia&sec=Politik&pg=po\\_02.htm](http://www.utusan.com.my/utusan/info.asp?y=2011&dt=1003&pub=Utusan_Malaysia&sec=Politik&pg=po_02.htm)